

摘藻堂四庫全書薈要

史部

欽定四庫全書薈要

史部

通志卷一百八十四



詳校官員外郎臣楊世綸

欽定四庫全書薈要卷九千一百二

史部

通志卷一百八十四

宋 右迪功郎 鄭樵 漁仲 撰

 佞幸傳第一

史記立佞幸傳前漢北齊不易其名宋曰恩倖臣
後魏曰恩倖今總曰佞幸

前漢

鄧通 趙談 韓嫣 淳于長

張放

董賢

閔王

宋

戴法興

戴明寶

董元

徐爰

阮佃夫

于天寶

姜產之

王道

隆楊運長

南齊

紀僧真

劉係宗

茹法亮

呂文度

蔡母

珍之

道剛

曹

呂文顯

茹法珍

梅蟲兒

徐世擢

梁

周石珍

陸驗

徐麟

陳

司馬申

施文慶

沈客卿

孔範

後魏

王叡

子襲椿

王仲興

趙修

茹皓

常季賢靜

徐義恭陳埽

趙邕

侯剛

徐紇

鄭儼

郭秀

北齊

和士開

安吐根

穆提婆

母陸令萱

高阿那肱

韓鳳

前漢

漢興佞幸寵臣高祖時則有籍孺孝惠有閼孺此兩人
非有才能但以婉媚貴幸與上卧起公卿皆因關說故
孝惠時郎侍中皆冠駿驥員帶傅脂粉化閼籍之屬也
兩人徙家安陵其後寵臣孝文時士人則鄧通宦者則
趙談北宮伯子孝武時士人則韓嫣宦者則李延年孝
元時宦者則弘恭石顯孝成時士人則張放淳于長孝
哀時則有董賢孝景昭宣時皆無寵臣景帝唯有郎中
令周仁昭帝時駙馬都尉稅侯金賞嗣父車騎將軍日

碑為侯二人之寵取過庸不篤宣帝時侍中中郎將張
彭祖少與帝微時同席研書及帝即尊位彭祖以舊恩
封陽都侯出常參乘號為愛幸其人謹敕無所虧損為
其小妻所毒薨國除

鄧通蜀郡南安人也以濯船為黃頭郎

濯直教反持濯
行船也土勝水

其色黃故刺船郎皆著
黃帽因號曰黃頭郎

文帝嘗夢欲上天不能有一黃

頭郎從後推上天顧見其衣尻帶後穿覺而之漸臺以
夢中陰目求推者郎見鄧通其衣後穿夢中所見也召

問其名姓姓鄧名通鄧猶登也文帝甚說尊幸之日貴
異通亦愿謹不好外交雖賜洗沐不欲出於是文帝賞
賜通鉅萬以十數官至上大夫文帝時問如通家遊戲
然通無他技能不能有所薦達獨自謹身以媚上而已
上使善相者相通曰當貧餓死上曰能富通者在我何
說貧於是賜通蜀嚴道銅山得自鑄錢鄧氏錢布天下
其富如此文帝嘗病癰鄧通嘗為上嗽吮之上不樂從
容謂曰天下誰最愛我者通曰宜莫若太子太子入問

疾上使太子齧癰太子嗽癰而色難之已而聞通常為
上齧之太子大慙繇是心怨通及文帝崩景帝立鄧通
免家居居無何人有告通盜出徼外鑄錢下吏驗問頗
有遂竟案盡沒入之通家尚負責數鉅萬長公主賜鄧
通吏輒隨沒之一簪不得著身於是長公主乃令假衣
食竟不得名一錢寄死人家

趙談者以星氣幸北宮伯子長者愛人故親近然皆不
比鄧通

韓嫣字王孫弓高侯顏當之孫也武帝為膠東王時嫣與上學書相愛及上為太子愈益親嫣嫣善騎射聰慧上已即位欲事伐胡而嫣先習兵以故益尊貴官至上大夫賞賜倣鄧通始時嫣常與上卧起江都王入朝得從獵上林中天子車駕蹕道未行而先使嫣乘副車從數十百騎馳視獸江都王望見以為天子辟從者伏謁道旁嫣驅不見既過江都王怒為皇太后泣請得歸國入宿衛比韓嫣太后由此銜嫣嫣侍出入永巷不禁以

奸聞皇太后太后怒使使賜媽死上為謝終不能得媽
遂死弟說亦愛幸以軍功封案道侯巫蠱時為廢太子
所殺子增封龍雒侯大司馬車騎將軍自有傳

淳于長字子孺魏郡元城人也少以太后姊子為黃門
郎未得進幸會大將軍王鳳病長侍病晨夜扶丞左右
甚有甥舅之恩鳳且終以長屬託太后及帝帝嘉長義
拜為列校尉諸曹遷水衡都尉侍中至衛尉九卿久之
趙飛燕貴幸上欲立以為皇后太后以其所出微難之

長主往來通語東宮歲餘趙皇后得立上甚德之迺追
顯長前功下詔曰前將作大匠解萬年奏請營作昌陵
罷弊海內侍中衛尉長數白宜止徙家反故處朕以長
言下公卿議者皆合長計首建至策民以康寧其賜長
爵關內侯後遂封為定陵侯大見信用貴傾公卿外交
諸侯牧守賂遺賞賜亦繁鉅萬多畜妻妾淫於聲色不
奉法度初許皇后坐執左道廢處長定宮而后姊嬪為
龍顏思侯夫人寡居長與嬪私通因取為小妻許后因

嬖賂遺長欲求復為健仔長受許后金錢乘輿服御物
前後千餘萬詐許為白上立以為左皇后嬖每入長定
宮輒與嬖書戲侮許后嫚易無不言交通書記賂遺連
年是時帝舅曲陽侯王根為大司馬驃騎將軍輔政數
歲久病數乞骸骨長以外戚居九卿位次第當代根根
兄子新都侯王莽心害長寵私間長取許嬖受長定宮
賂遺莽侍曲陽侯疾因言長見將軍久病意喜自以為
代輔政至對衣冠議語署置具言其罪過根怒曰即如

是何不白也莽曰未知將軍意故未敢言根曰趣白東
宮莽求見太后具言長驕佚欲代曲陽侯對莽母上車
私與長定貴人姊通受取其衣物太后亦怒曰兒至如
此往白之帝莽白上上乃免長官遣就國初長為侍中
奉兩宮使親密紅陽侯立獨不得為大司馬輔政立自
疑為長毀譖常怨毒長上知之及長當就國也立嗣子
融從長請車騎長以珍寶因融重遺立立因為長言於
是天子疑焉下有司案驗吏捕融立令融自殺以滅口

上愈疑其有大姦遂逮長繫洛陽詔獄窮治長具服戲侮長定宮謀立左皇后臯至大逆死獄中妻子當坐者徙合浦母若歸故郡紅陽侯立就國將軍卿大夫郡守坐長免罷者數十人莽遂代根為大司馬久之還長母及子酺於長安後酺有臯莽復殺之徙其家屬歸故郡始長以外親親近其愛幸不及富平侯張放放常與上卧起俱為微行出入

董賢字聖卿雲陽人也父恭為御史任賢為太子舍人

哀帝立賢隨太子官為郎二歲餘賢傳漏在殿下為人
美麗自喜哀帝望見悅其儀貌識而問之曰是舍人董
賢邪因引上與語拜黃門郎由是始幸問及其父為雲
中侯即日徵為霸陵令遷光祿大夫寵愛日甚為駙馬
都尉侍中出則驂乘入御左右旬月間賞賜累鉅萬貴
震朝廷嘗與上卧起嘗晝寢偏藉上裊上欲起賢未覺
不欲動賢乃斷裊而起其恩愛至此賢亦性柔和便辟
善為媚以自固每賜洗沐不肯出常留中視醫藥上以

賢難歸詔令賢妻得通引籍殿中止賢廬若吏妻子居
官寺舍又召賢女弟以為昭儀位次皇后更名其舍為
椒風以配椒房云昭儀及賢與妻旦夕上下並侍左右
賞賜昭儀及賢妻亦各千萬數遷賢父為少府賜爵關
內侯食邑復徙為衛尉又以賢妻父為將作大匠弟為
執金吾詔將作大匠為賢起大第北闕下重殿洞門土
木之功窮極伎巧柱檻衣以綈錦下至賢家僮僕皆受
上賜及武庫禁兵上方珍寶其選物上第盡在董氏而

乘輿所服乃其副也及至東園祕器珠襦玉柙豫以賜
賢無不備具又令將作為賢起冢塋義陵旁內為便房
剛栢題湊外為徼道周垣數里門闢杳忽甚盛上欲侯
賢而未有緣會待詔孫寵息夫躬等告東平王雲后謁
祠祀祝詛下有司治皆伏其辜上於是令躬寵為因賢
告東平事者迺以其功下詔封賢為高安侯躬宜陵侯
寵方陽侯食邑各千戶頃之復益封賢二千戶丞相王
嘉內疑東平事寃甚惡躬等數諫諍以賢為亂國制度

嘉竟坐言事下獄死上初即位祖母傳太后母丁太后
皆在兩家先貴傳太后從弟喜先為大司馬輔政數諫
失太后指免官上舅丁明代為大司馬亦任職頗害賢
寵及丞相王嘉死明甚憐之上寢重賢欲極其位而恨
明如此遂冊免明令上驃騎將軍印綬罷歸就第遂以
賢代明為大司馬衛將軍是時賢年二十二雖為三公
常給事中領尚書百官因賢奏事以父恭不宜在卿位
徙為光祿大夫秩中二千石弟寬信代賢為駙馬都尉

董氏親屬皆侍中諸曹奉朝請寵在丁傳之右矣明年
匈奴單于來朝宴見羣臣在前單于怪賢年少以問譯
上令譯報曰大司馬賢年少以大賢居位單于乃起拜
賀漢得賢臣初丞相孔光為御史大夫賢父恭為御史
事光及賢為大司馬與光並為三公上故令賢私過光
光雅恭謹知上欲尊寵賢及聞賢當來也光警戒衣冠
出門待望見賢車乃却入賢至中門光又入閤既下車
乃出拜謁送迎甚謹不敢以賓客鈞敵之禮賢歸上聞

之喜立拜光兩兄子為諫大夫常侍賢由是權與人主
侔矣是時成帝外家王氏衰廢唯平阿侯譚子去疾哀
帝為太子時為庶子得幸及即位為侍中騎都尉上以
王氏亡在位者遂用舊恩親近去疾復進其弟閎為中
常侍閎妻父蕭咸前將軍望之子也久為郡守病免為
中郎將兄弟並列賢父恭慕之欲與結婚姻閎為賢弟
寬信求咸女為婦咸惶恐不敢當初上冊拜賢為大司
馬其文有曰允執其中至是咸私謂閎曰董公為大司

馬冊文言允執其中此乃堯禪舜之文非三公故事長

老見者莫不心懼此豈家人子所能堪邪閎性有智略

聞咸言心亦悟乃還報恭深達咸自謙薄之意恭歎曰

我家何用負天下而為人所畏如是意不說後上置酒

麒麟殿賢父子親屬宴飲王閎兄弟侍中中常侍皆在

側上有酒所從容視賢而笑曰吾欲法堯禪舜何如閎

進曰天下乃高皇帝之天下非陛下之有也陛下奉承

宗廟當傳子孫於無窮統業至重天子無戲言上默然

不悅左右皆恐於是遣闕出後不得復侍宴賢第新成
功堅其外大門無故自壞賢心惡之後數月哀帝崩太
皇太后召大司馬賢引見東廂問以喪事調度賢內憂
不能對免冠謝太后曰新都侯莽前以大司馬奉送先
帝大行曉習故事吾令莽佐君賢頓首曰幸甚太后遣
使者召莽既至以太后指使尚書劾賢帝病不親醫藥
禁止賢不得出入宮殿司馬門中賢不知所為詣闕免
冠徒跣謝莽使謁者以太后詔即闕下策免賢收大司

馬印綬罷歸第即日賢與妻皆自殺家惶恐夜葬莽疑其詐死有司奏請發賢棺至獄詎視莽復風大司徒光奏賢罪大親屬不宜在中土請收沒入財物縣官諸以賢為官者皆免父恭弟寬信與家屬徙合浦母別歸故郡鉅鹿長安中小民謹誨鄉其第哭幾獲盜之縣官斥賣董氏財凡四十三萬萬賢既見發羸詎其尸因埋獄中賢所厚吏沛朱詡自劾去大司馬府買棺衣收賢尸葬之王莽聞之大怒以他臯擊殺詡詡子浮建武中貴

顯至大司馬司空封侯而王閔王莽時為牧守所居見
紀莽敗乃去官世祖下詔曰武王克殷表商容之間閔
脩善謹勅兵起吏民獨不爭其頭首今以閔子補吏至
墨綬卒官蕭咸外孫云

宋

戴法興會稽山陰人也家貧父碩子以販紵為業法興
二兄延壽延興並脩立延壽善書法興好學山陰有陳
戴者家富有錢三十萬鄉人咸云戴碩子三兒敵陳戴

三千萬錢法興少賣葛於山陰市後為尚書倉部令史
大將軍彭城王義康於尚書中覓了了令史得法興為
記室令史義康敗仍為孝武征虜撫軍記室掾及徙江
州仍補南中郎典籤帝於巴口建義法興與典籤戴明
寶蔡閑俱轉參軍督護及上即位並為南臺侍御史同
兼中書通事舍人法興等專管內務權重當時孝建元
年為南魯郡太守解舍人侍太子於東宮大明初三典
籤並以南下預密謀封法興吳昌縣男明寶湘鄉縣男

閑時已卒追加爵封法興轉給事中太子旅賁中郎將
孝武親覽朝政不任大臣而腹心耳目不得無所委寄
法興頗知古今素見親待雖出侍東宮而倚任隆密魯
郡巢尚之人士之末元嘉中侍始興王濬讀書亦涉獵
文史為上所知孝建初補東海國侍郎仍兼中書通事
舍人凡選授遷轉誅賞大處分上皆與法興尚之參決
內外諸雜事多委明寶上性嚴暴睚眦之間動至罪戮
尚之每臨事解釋多得全免殿省甚賴之而法興明寶

大通人事多納貨賄凡所薦達言無不行天下輻湊門
外成市家產並累千金明寶驕縱尤甚長子敬為揚州
從事與上爭買御物六宮嘗出敬盛服騎馬於車左右
馳驟去來上大怒賜敬死繫明寶尚方尋被原釋委任
如初孝武崩前廢帝即位法興遷越騎校尉時太宰江
夏王義恭錄尚書事任同總已而法興尚之執權日久
威行內外義恭積相畏服至是懾憚尤甚廢帝未親萬
機凡制勅施為悉決法興之手尚書中事無大小專斷

之顏師伯義恭守空名而已尚之甚聰敏時百姓欲為孝武立寺疑其名尚之應聲曰宜云天保詩云天保下報上也時服其機速廢帝年已漸長凶志轉成欲有所為法興每相禁制謂帝曰官所為如此欲作營陽邪帝意稍不能平所愛幸閹人華願兒有盛寵賜與金帛無算法興常加裁減願兒甚恨之帝常使願兒出入市里察聽風謠而道路之言謂法興為真天子帝為贗天子願兒因此告帝曰外間云宮中有兩天子官是一人戴

法興是一人官在深宮中人物不相接法興與太宰顏
柳一體往來門客恒有數百內外士庶莫不畏服之法
興是孝武左右復久在宮闈今將他人作一家深恐此
坐席非復官許帝遂免法興官徙付遠郡尋於家賜死
法興臨死封閉庫藏使家人謹視牡籥死一宿又殺其
二子截法興棺焚之籍沒財物法興能為文章頗行於
世死後帝敕巢尚之曰不謂法興積累愆遂至於此
吾今自覽萬機卿等宜竭盡誠力尚之時為新安王子

鸞撫軍中兵參軍淮陵太守乃解舍人轉為撫軍諮議
參軍太守如故明帝初復以尚之兼中書通事舍人南
清河太守累遷黃門侍郎出為新安太守病卒戴明寶
南東海丹徒人亦歷員外散騎常侍給事中考武時帶
南清河太守前廢帝即位權任悉歸法興而明寶輕矣
明帝初天下反叛以明寶舊人屢經戎事復委任之後
坐納貨賄繫尚方尋被宥位宣城太守昇明初以老拜
太中大夫病卒武陵國典書令董元嗣與法興明寶等

俱為孝武南中郎典籤元嘉三十年奉使還都會元凶弒逆遣元嗣南還報上以徐湛之等反上時在巴口元嗣具言弒逆狀上遣元嗣下都奉表於劬既而上舉義兵劬詔責元嗣元嗣答云始王未有反謀劬不信備加考掠不伏遂死時孝武帝尅京師贈員外散騎侍郎使文士蘇寶生為之誄焉大明中又有奚顯度者南東海郡人官至員外散騎侍郎孝武嘗使督領人功而苛虐無道動加捶撲暑雨寒雪不聽暫休人不堪命或自經

死時建康縣考囚或用方材壓額及踝脛人間謠曰寧
得建康壓額不能受奚度拍又相戲曰勿反顧付奚度
其酷暴如此前廢帝嘗戲云顯度刻虐為百姓所疾此
當除之左右因唱爾即日宣殺焉時人比之孫皓殺岑
昏焉

徐爰字長王南琅邪開陽人也本名瑗以與傅亮父同
名亮啟改為爰初為晉琅邪王大司馬府中典軍從北
征微密有意理為武帝所知少帝在東宮入侍左右文

帝初又見親任遂至殿中侍御史元嘉十二年轉南臺御史始與王濬後行參軍復侍太子於東宮遷員外散騎侍郎文帝每出軍常懸授兵略二十九年重遣王玄謨等北侵配爰五百人隨軍礪礪銜中旨臨時宣示孝武至新亭大將軍江夏王義恭南奔爰時在殿內誑劬追義恭因即得南走時孝武將即大位軍府造次不暇朝章爰素諳其事既至莫不喜悅以兼太常丞撰立儀注後兼尚書右丞遷左丞先是元嘉中使著作郎何承

天草創國史孝武初使奉朝請山謙之南臺御史蘇寶生踵成之孝建六年又以爰領著作即使終其業爰雖因前作而專為一家之書上表起元義熙為王業之始載序宣力為功臣之斷桓玄篡竊同於王莽雖靈武克殄自詳之晉錄及犯命干紀受戮霸朝雖在揖禪之前皆著之宋策國典體大方垂不朽請別加詳議於是內外博議太宰江夏王義恭等三十五人同爰議宜以義熙元年為斷散騎常侍巴陵王休若尚書金部郎檀道

鸞二人謂宜以元興三年為始太學博士虞穌謂宜以
開國為宋公元年詔曰項籍聖公編錄二漢前史已有
成例桓玄傳宜在宋典餘如爰議孝武崩景寧陵爰
以本官兼將作大匠爰便辟善事人能得人主微旨頗
涉書傳尤悉朝儀元嘉初便入侍左右預參顧問既長
於附會又飾以典文故為文帝所任遇大明世委寄尤
重朝廷大禮儀非爰議不行雖復當時碩學所解過人
者既不敢立異議所言亦不見從孝武崩公除後晉安

王子勛侍讀博士諮爰宜習業與否爰答曰居喪讀喪
禮習業何嫌少日始安王子真博士又諮爰爰曰小功
廢業三年喪何容讀書其專斷乖謬如此前廢帝凶暴
殿省舊人多見罪黜唯爰巧於將迎終始無忤誅羣公
後以爰為黃門侍郎領射聲校尉著作如故封吳平縣
子寵待隆密羣臣莫比帝每出行常與沈慶之山陰公
主同輦爰亦預焉明帝即位以黃門侍郎改領長水校
尉兼尚書左丞明年除太中大夫著作並如故爰執權

日久上在藩素所不悅及景和世屈辱卑約爰禮敬甚
簡益銜之泰始三年詔暴其罪徙交州及行又詔除廣
州統內郡有司奏以為宋隆太守除命既下爰已至交
州詔聽還仍除南康郡丞明帝崩還都以爰為濟南太
守復除中散大夫元徽三年卒身歷七朝年八十二爰
子希秀甚有學解亦閑篆隸正覺禪林二寺碑即希秀
書也爰之徙交州明帝召希秀謂曰比當令卿父還希
秀再拜荅曰臣父年老恐不及後恩帝大嗟賞即召爰

還希秀位驍騎將軍淮南太守子泓甚閑吏職而在事
刻薄於人少恩仕齊歷位臺郎秣陵建康令湘東太守
阮佃夫會稽諸暨人也元嘉中出身為臺小史明帝初
出閣選為主衣後又請為世子師甚見信待景和末明
帝被拘於殿內住在祕書省為帝所疑大禍將至計無
從出佃夫與王道隆李道兒及帝左右琅邪淳于文祖
謀共廢立時直閣將軍柳光世亦與帝左右蘭陵繆方
盛丹陽周登之有密謀未知所奉登之與明帝有舊方

盛等乃使登之結佃夫佃夫大悅先是帝立皇后普暫
撤諸王奄人明帝左右錢藍生亦在例事畢未被遣密
使藍生候帝慮事泄藍生不欲自出帝動止輒以告淳
于丈祖令報佃夫景和元年十一月二十九日晡時帝
出幸華林園建安王休仁山陽王休祐山陰王並侍側
明帝猶在祕書省不被召益懼佃夫以告外監典事東
陽朱幼又告主衣吳興壽寂之細鎧主南彭城姜產之
產之又語所領細鎧將臨淮王敬則幼又告中書舍人

戴明寶並響應明寶幼欲取其日向曉佃夫等勸取開
門鼓時幼預約勒內外使錢藍生密報建安王休仁等
時帝欲南巡腹心直閣將軍宗越等其夕並聽出外裝
束唯有隊主樊僧整防華林閣僧整是柳光世鄉人光
世要之即受命姜產之又要隊副陽平聶慶及所領壯
士會稽富靈符吳郡俞道龍丹陽宋達之陽平田嗣並
聚於慶省佃夫慮力少更欲招合壽寂之曰謀廣事泄
不煩多人時巫覡言後堂有鬼其夕帝於竹林堂前與

巫共射之建安王休仁等山陰主並從帝素不悅寂之
見輒切齒寂之既與佃夫等成謀又慮禍至抽刀前入
姜產之隨其後淳于文祖繆方盛周登之富靈符聶慶
田嗣王敬則俞道龍宋遠之又繼進休仁聞行聲甚疾
謂休祐曰事作矣相隨奔景陽山帝見寂之至引弓射
之不中而走寂之追而弑之事定宣令宿衛曰湘東王
受太后令除狂主今已平定明帝即位論功行封壽寂
之姜產之佃夫王道隆淳于文祖李道兒繆方盛周登

之等七人皆封縣侯富靈符聶慶田嗣王敬則俞道龍
宋達之等六人皆封縣子佃夫遷南臺侍御史薛索兒
度淮為寇山陽太守陳天祚又反佃夫與諸軍破薛索
兒降天祚後轉太子步兵校尉南魯郡太守侍太子於
東宮泰始四年以本官兼游擊將軍及輔國將軍蓋次
陽與二衛參員直次陽字崇基平昌安丘人也位冠軍
將軍卒時佃夫及王道隆楊運長並執權亞人主巢戴
大明之世方之蔑如也嘗正旦應合朔尚書奏遷元會

佃夫曰元正慶會國之大禮何不遷合朔日邪其不稽
古如此大通貨賄凡事非重賂不行人有餉絹二百匹
嫌少不答書宅舍園池諸王邸第莫及女妓數十藝貌
冠絕當時金玉錦繡之飾宮掖不逮也每製一衣造一
物京邑莫不法效焉於宅內開瀆東出十許里塘岸整
潔汎輕舟奏女樂中書舍人劉休嘗詣之值佃夫出行
中路相逢要休同反就席便令施設一時珍羞莫不備
具凡諸火劑並皆始熟如此者數十種佃夫常作數十

人饌以待賓客故造次便辦類皆如此雖晉世王石不能過也泰始初軍功既多爵秩無序佃夫僕從附隸皆受不次之位捉車人虎賁中郎將傍馬者員外郎朝士貴賤莫不自結而矜傲無所降意入其室者唯吳興沈勃吳郡張澹數人而已明帝晏駕後廢帝即位佃夫權任轉重兼中書通事舍人加給事中輔國將軍餘如故欲用張澹為武陵郡左衛將軍袁粲以下皆不同而佃夫稱敕施行又廬江何恢有妓張耀華美而有寵為廣

州刺史將發要佃夫飲設樂佃夫見張氏悅之頻求於
恢恢曰恢可得此人不可得也佃夫拂衣出戶曰卿惜
指不知失掌邪遂諷有司以公事彈恢凡如此類粲等
並不敢執元徽三年遷黃門侍郎領右衛將軍明年改
領驍騎將軍遷南豫州刺史歷陽太守猶管內任時廢
帝猖狂好出游走始出宮猶整羽儀隊伍俄而棄部伍
單騎與數人相隨或出郊野或入市廛內外莫不憂懼
佃夫密與直閣將軍申伯宗步兵校尉朱幼干天寶謀

共廢帝立安成王五年春帝欲往江乘射雉帝每出常
留隊仗主樂游苑至是棄仗而去佃夫欲稱太后令喚
隊仗還閉城門分人守石頭東府遣人執帝廢之自為
揚州刺史輔政與申伯宗等已成謀會帝不成向江乘
故其事不行于天寶因以其謀告帝帝乃收佃夫幼伯
宗於光祿外郎賜死佃夫幼等罪止一身餘無所問朱
幼泰始初為外監配衣諸軍征討有濟辦之能遂官陟
三品為奉朝請南高平太守封安浦縣侯于天寶其先

胡人豫竹林堂功元徽中封鄂縣子發佃夫謀以為清
河太守右軍將軍昇明中齊高帝以其反覆賜死壽寂
之位太子屯騎校尉南泰山太守多納貨賄請謁無窮
有一不從便切齒罵詈常云利刀在手何憂不辦鞭尉
吏斫邏將後為有司所奏徙送越州至豫章謀反乃殺
之姜產之位南濟陽太守後北侵魏戰敗見殺王道隆
吳興烏程人兄道迄涉學善書形貌又美吳興太守王
韶之謂人曰有子弟如王道迄無所少道隆亦知書泰

始二年兼中書通事舍人道隆為明帝所委過於佃夫
而和謹自保不妄毀傷人執權既久家產豐積豪麗雖
不及佃夫而精整過之元徽二年桂陽王休範舉兵乃
以討佃夫道隆及楊運長為名休範奄至新亭見殺楊
運長宣城懷安人素善射為射師性謹慤為明帝委信
及即位親遇甚厚後廢帝即位與佃夫俱兼通事舍人
以平桂陽王休範功封南城縣子運長質本廉正脩身
甚清不事園宅不受餉遺而凡鄙無識唯與寒人潘智

徐文盛厚善動止施為必與二人量議文盛為奉朝請
預平桂陽王休範封廣晉縣男順帝即位運長為宣城
太守尋還家沈攸之反運長有異志齊高帝遣驃騎司
馬崔文仲誅之

南齊

紀僧真丹陽建康人也少隨征西將軍蕭思話及子惠
開皆被賞遇惠開性苛僧真以微過見罰既而委任如
舊及罷益州還都不得志而僧真事之愈謹惠開臨終

歎曰紀僧真方當富貴我不見也以僧真託劉秉周顯
初惠開在益州益州反被圍危急有道人謂之曰城圍
尋解檀越貴門後方大興無憂外賊也惠開密謂僧真
曰我子弟見在者並無異才政是蕭道成耳惠開沒僧
真憶其言乃請事高帝隨從在淮陰以閑書題令答遠
近書疏自寒官歷至高帝冠軍府參軍主簿僧真夢蒿
艾生滿江驚而白之高帝曰詩人采蕭蕭即艾也蕭生
斷流卿勿廣言其見親如此元徽初從高帝出頓新亭

拒桂陽賊有功除南臺御史高帝領軍功曹高帝將廢
立謀之袁粲褚淵僧真啓曰今朝廷猖狂人不自保天
下之望不在袁褚明公豈得默然坐受夷滅存亡之機
仰希熟慮高帝納之高帝欲度廣陵起兵僧真又曰主
上雖復狂釁而累世皇基猶固磐石今百口北度何必
得俱縱得廣陵城天子居深宮施號令目明公為逆何
以避此如其不勝則應北走胡中竊謂此非萬全策也
高帝曰卿顧家豈得逐我行邪僧真頓首稱無貳昇明

元年除員外郎帶東武城令尋除給事中高帝坐東府
高樓望石頭城僧真在側上曰諸將勸我攻袁劉我意
未願便爾及沈攸之事起從高帝入朝堂石頭反夜高
帝遣衆軍掩討宮城中望石頭火光及叫聲甚盛人懷
不測僧真謂衆曰叫聲不絕是必官軍所攻火光起者
賊不容自燒其城此必官軍勝也尋而啓石頭平上出
頓新亭使僧真領軍千人在帳內初上在領軍府僧真
學上手迹下名至是報答書疏皆付僧真上觀之笑曰

我亦不復能別也初上在淮陰脩理城得古錫趺九枚
大數尺下有篆文莫能識者僧真省事獨曰何須辯此
文字此自久遠之物錫而有九九錫之徵也高帝曰卿
勿妄言及上將拜齊公已尅日有楊祖之謀於臨軒作
難僧真具請上更選吉辰尋而祖之事覺上曰無卿言
亦當致小狼狽此何異滹沱之水轉齊國中書舍人建
元初帶東燕令封新陽縣男轉羽林監遷尚書主客郎
太尉中兵參軍兼中書舍人高帝疾甚令僧真典遺詔

永明元年丁父喪起為建威將軍尋除南太山太守又
為舍人僧真容貌言吐雅有士風武帝嘗目送之笑曰
人生何必計門戶紀僧真堂堂貴人所不及也諸權要
中最被眄遇後除前軍將軍遭母喪開冢得五色兩頭
蛇武帝崩僧真號泣思慕明帝以僧真歷朝驅使建武
初除游擊將軍兼司農待之如舊欲令僧真臨郡僧真
啓進其弟僧猛為鎮蠻護軍晉熙太守永泰元年除司
農卿明帝崩掌山陵事出為廬陵內史卒于官弟僧猛

卒於晉熙太守兄弟皆有風姿舉止並善隸書僧猛又能飛白書作飛白賦僧真子交卿甚有解用宋時有道人楊法持與高帝有舊元徽末宣傳密謀昇明中以為僧正建元初罷道為寧朔將軍封州陵男二年遣法持為軍主領支軍救援朐山永明四年坐役使客將奪其鮭稟削封云

劉係宗丹陽人也少便書畫為宋竟陵王誕子景粹侍書誕舉兵廣陵城內皆死敕沈慶之赦係宗以為東宮

侍書奉始中為主書以寒宦累至勲品元徽初為奉朝

請兼中書通事舍人員外郎封始興南亭侯帶秣陵令

高帝廢蒼梧明旦呼正直舍人虞整醉不能起係宗歡

喜奉敕高帝曰今天地重開是卿盡力之日使寫諸處

分敕令及四方書疏使主書十人書吏二十人配之事

皆稱旨高帝即位除龍驤將軍建康令永明初為右將

軍淮陵太守兼中書通事舍人母喪自解起復本職四

年白賊唐寓之起宿衛兵東討遣係宗隨軍慰勞遍至

遭賊郡縣百姓被驅逼者悉無所問還復人伍係宗還
上曰此段有征無戰以時平蕩百姓安恬甚快也賜係
宗錢帛上欲脩白下城難於動役係宗啟誨役在東人
丁隨寓之為逆者上從之後車駕出講武上履行白下
城曰劉係宗為國家得此一城永明中魏使書常令係
宗題答祕書局皆隸之再為少府鬱林即位除寧朔將
軍宣城太守係宗久在朝省閑於職事武帝常云學士
輩不堪經國唯大讀書耳經國一劉係宗足矣沈約王

融數百人於事何益其重吏事如此建武二年卒官

茹法亮吳興武康人也宋大明中出身為小史歷齊幹
扶侍孝武末年鞭罰過度校獵江右選白衣左右百八
十人皆面首富室從至南州得鞭者過半法亮憂懼因
緣啓出家得為道人明帝初罷道結事阮佃夫累至高
帝冠軍府行參軍及武帝鎮湓城須舊驅使人法亮求
留為武帝江州典籤除南臺御史帶松滋令法亮便僻
解事善於承奉稍見委信建元初度東宮主書除奉朝

請補東宮通事舍人武帝即位仍為中書通事舍人除
員外郎帶南濟陰太守與會稽呂文度臨海呂文顯並
以姦佞諂事武帝文度為外監專制兵權領軍將軍守
虛位而已天文寺常以上將星占文度吉凶文度尤見
委信上嘗云公卿中有憂國如文度者復何憂天下不
寧文度既見委用大納財賄廣開宅宇盛起土山奇禽
怪樹皆聚其中後房羅綺王侯不能及又啓上籍被却
者悉充遠戍百姓嗟怨或逃亡避咎富陽人唐寓之因

此聚黨為亂鼓行而東乃於錢唐縣僭號以新城戍為偽宮以錢唐縣為偽太子宫置百官皆備三吳却籍者奔之衆至三萬竊稱吳國偽年號興平其源始於虞玩之而成於文度事見虞玩之傳法亮文度並勢傾天下太尉王儉常謂人曰我雖有大位權寄豈及茹公永明二年封望蔡縣男七年除臨淮太守轉竟陵王司徒中兵參軍巴東王子響於荊州殺僚佐上遣軍西上使法亮宣旨安撫子響法亮至江津子響呼法亮法亮疑畏

不肯往又求見傳詔法亮又不遣故子嚮怒遣兵破尹
略軍事平法亮至江陵誅賞處分皆稱敕斷決軍還上
悔誅子嚮法亮被責少時親任如舊廣開宅宇私齋光
麗與延昌殿相埒延昌殿武帝中齋也宅後為魚池釣
臺土山樓館長廊將一里竹林花藥之美公家苑囿所
不能及鬱林即位除步兵校尉時有綦母珍之居舍人
之任凡所論薦事無不允內外要職及郡丞尉皆論價
而後施行貨賄交至旬月之間累至千金帝給珍之宅

宅邊又有空宅從即併取輒令材官營作不關詔旨材
官將軍細作丞相語云寧拒至尊敕不可違舍人命珍
之母隨弟欽之作暨陽令欽之罷縣還珍之迎母至湖
熟輒將青氍百人自隨鼓角橫吹都下富人追從者百
數欽之自行佐作縣還除廬陵王驃騎參軍又詐宣敕
使欽之領青氍珍之有一銅鏡背有三公字常語人云
徵祥如此何患三公不至乃就蔣王廟乞願得三公封
郡王啟帝求封朝議未許又自陳曰珍之西州伏事侍

從入宮契闊心膂竭盡誠力王融姦謀潛構自非珍之
翼衛扶持事在不測今惜千戶侯誰為官使者又有牒
自論於朝廷曰當世祖晏駕之時內外紛擾珍之手抱
至尊口行處分忠誠契闊人誰不知今希千戶侯於分
非過乃許三百戶瞋恚形於言色進為五百戶又不肯
受明帝議誅之乃許封汝南縣有杜文謙者吳郡錢唐
人帝為南郡王文謙侍五經文句歷太學博士出為漂
陽令未之職會明帝知權蕭湛用事文謙乃謂珍之曰

天下事可知灰盡粉滅匪朝伊夕不早為計吾徒無類
矣珍之曰計將安出荅曰先帝故人多見擯斥今召而
使之誰不慷慨近聞王洪輒與趙越常徐亮僧萬靈會
共語皆攘袂搥牀君其密報周奉叔使萬靈會魏僧勔
殺蕭湛則宮內之兵皆我用也即勒兵入尚書斬蕭令
兩都伯力耳其次則遣荆軻豫讓之徒因諮事左手頓
其胸則方寸之刃足以立事亦萬世一時也今舉大事
亦死不舉事亦死二死等耳死社稷可乎若遲疑不斷

復少日錄君稱敕賜死父母為殉在眼中矣珍之不能用時徐龍駒亦當得封珍之恥與龍駒共詔因求別立事未及行而事敗珍之在西州時有一手版相者云當貴每以此言動帝又圖黃門郎帝嘗問之曰西州時手版何在珍之曰此是黃門手版官何須問帝大笑珍之時為左將軍南彭城太守領中書通事舍人正直宿宣旨使即往蔣王廟祈福因收送廷尉與周奉叔杜文謙同死文謙有學行善言吐其父聞其死曰吾所以憂者

恐其不得死耳今以忠義死復何恨哉王經母所以

欣經之義也時人美其言龍駒以閹人本給安陸侯後

度東宮為齋帥帝即位以後便佞見寵凡諸鄙黷雜事

皆所誘勸位羽林監後閤舍人黃門署令淮陵太守帝

為龍駒置嬪御妓樂常往含章殿著黃綸帽被貂裘南

面向案代帝畫敕內左右侍直與帝不異前代趙忠張

讓之徒莫之能比封惠懷縣男事未行明帝請誅之懇

至乃見許曹道剛廢帝之日直閤省蕭湛先入若欲論

事兵隨後奄進以刀刺之洞胸死因進宮內廢帝直後
徐僧亮盛怒大言於衆曰吾等荷恩今日應死報又見
殺道剛字景昭彭城人性質直帝雖與之狎而未嘗敢
訓帝說市里雜事以為歡樂道剛輒避之益州人韓護
善騎馬帝嘗呼入華林園令騎大賞狎之道剛出謂明
帝主上猶是小兒左右皆須正人使日見禮則近聞韓
護與天子齊馬並馳此導人君於危地道剛欲殺之既
而遣人刺殺護及道剛死張融謂劉繪曰道剛似不為

諂亦復不免也答曰夫徑寸之珠非不寶也而蟬之所
病云何不療之哉此道剛所以死也明帝即位高武舊
人鮮有存者法亮以主者久事故不見疑位任如故先
是延昌殿為武帝陰室藏諸服御二少帝並居西殿及
明帝居東齋開陰室出武帝白紗帽防身刀法亮獻
流涕永泰元年王敬則事平法亮復受敕宣慰諸郡無
所受納東昏即位出法亮為大司農中書權利之職法
亮不樂去固辭不受既而代人已到法亮垂涕而出卒

官

呂文顯臨海人也昇明初為高帝錄尚書省事累遷殿中御史後為秣陵令封劉陽縣男永明元年為中書通事舍人文顯臨事以刻覈被知三年帶南清河太守與茹法亮等迭出入為舍人並見親幸多四方餉遺並造大宅聚山開池時中書舍人四人各住一省世謂之四戶既總重權勢傾天下晉宋舊制宰人之官以六年為限近世以六年過久又以三周為期謂之小滿而遷換

去來又不依三周之制送故迎新吏人疲於道路四方
守宰餉遺一年成數百萬舍人茹法亮於衆中語人曰
何須覓外祿此一戶內年辦百萬蓋約言之也其後玄
象失度史官奏宜脩祈禳之禮王儉聞之謂上曰天文
乖忤此禍由四戶仍奏文顯等專擅愆和極言其事上
雖納之而不能改也文顯累遷左中郎將南東莞太守
故事府州部內論事皆籤前直叙所論之事後云謹籤
日月下又云某官某籤故府州置典籤以典之本五品

吏宋初改為七職宋氏晚運多以幼少皇子為方鎮時
主皆以親近左右領典籤典籤之權稍重大明大始中
長王臨藩素族出鎮莫不皆出內教命刺史不得專其
任也宗慤為豫州吳喜公為典籤慤刑政所施喜公每
多違執慤大怒曰宗慤年將六十為國竭命政得一州
如斗大不能復與典籤共臨之喜公稽顙流血乃止自
此以後權寄彌隆典籤遞互還都一歲數反時主輒與
間言訪以方事刺史行事之美惡係於典籤之口莫不

折節推奉恒慮不及於是威行州郡權重藩君劉道濟
柯孟孫等姦匿發露雖即顯戮而權任之重不異明帝
輔政深知之始制諸州急事宜密有所論不得遣典籤
還都而典籤之任始輕後以文顯守少府見任使歷建
武永元之世至尚書右丞少府卿卒官

茹法珍會稽人梅蟲兒吳興人也齊東昏時並為制局
監俱見愛幸自江祐始安王遙光等誅後及左右應敕
捉刀之徒並專國命人間謂之刀敕權奪人主都下為

之語曰欲求貴職依刀敕須得富豪事捉刀時又有新
蔡人徐世擿尤見寵信自殿內主帥為直閭驍騎將軍
凡諸殺戮皆世擿所勸殺徐孝嗣後封臨汝縣子陳顯
達事起加輔國將軍雖用護軍崔慧景為都督而兵權
實在世擿當時權勢傾法珍蟲兒又謂法珍蟲兒曰何
世天子無要人但阿儂貨主惡耳法珍等與之爭權遂
以白帝帝稍惡其凶彊世擿竊欲生心左右徐僧重密
知之發其事收得千餘人仗及咒詛文又畫帝十餘形

像備為刑斬射支解之狀而自作已像著通天冠袞服題云徐氏皇帝永光二年事發乃族之自是法珍蟲兒用事並為外監口稱詔勅中書舍人王咺之與相脅齒專掌文翰其餘二十餘人皆有勢力崔慧景平後法珍封餘干縣男蟲兒封竟陵縣男崔慧景之平曲赦都下及南充州本以宥賊黨而羣凶用事刑辟不依詔書無罪家富者不論赦令莫不受戮籍其家產與慧景深相關為盡力而家貧者一無所問始安顯達時亦已如

此至慧景平復然或說王咺之云赦書無信人情大惡
咺之曰政當復有赦耳復赦羣小誅戮亦復如先帝自
羣公誅後無復忌憚無日不游走所幸潘妃本姓俞名
尼子王敬則妓也或云宋文帝有潘妃在位三十年於
是改姓曰潘其父寶慶亦從改焉帝呼寶慶及法珍為
阿父蟲兒及東冶營兵俞靈運為阿兒帝與法珍等俱
詣寶慶帝躬自汲水助厨人作膳為市中雜語以為諧
謔又常輕騎戎服往諸承勅家游宴有吉凶輒往慶弔

奄人王寶孫年十三四號為伥子最有寵參預朝政雖
王咥之蟲兒之徒亦下之控制大臣移易詔敕乃至騎
馬入殿詆訶天子公卿見之莫不懾息其佐成昏亂者
法珍蟲兒及王咥之俞寶慶俞靈運祝靈勇范亮之徐
僧重時崇濟芮安泰劉文泰呂文慶胡輝光繆賈養章
道之楊敬子李粲之周管之范曇濟石曇悅張惡奴王
勝公王懷藻梅師濟鄒伯兒史元益王靈範席休文解
滂及太史令駱文叔大巫朱光尚凡三十一人又有奄

官王寶孫王法昭許朗之許伯孫方佛念馬僧猛盛劬
王竺兒隨要索係世等十人梁武平建鄴皆誅又朱興
光為姑法珍所疾得罪被繫豐勇之與王珍國相知行
殺皆免初左右刀敕之徒悉號為鬼官中訛云趙鬼食
鴨劓諸鬼盡著調當時莫解梁武平建鄴東昏死羣小
一時誅滅故稱為諸鬼也俗間以細剉肉糅以薑桂曰
劓意者以凶黨皆細剉而烹之也

梁

周石珍建康之廝隸也世以販絹為業天監中稍遷至
宣傳左右身長七尺頗閑應對後遂至制局監帶開陽
令歷位直閣將軍太清三年封南豐縣侯猶領制局臺
城未陷已射書與侯景相結門初開石珍猶侍左右時
賊遣其徒入直殿內或驅馬出入殿庭武帝方坐文德
殿怪問之石珍曰皆丞相甲士上曰何物丞相對曰侯
丞相上怒叱之曰是名侯景何謂丞相石珍求媚於賊
乃養其黨田遷以為己子遷亦父事之景篡位制度羽

儀皆石珍自出景平後及中書舍人嚴亶等送于江陵
亶本為齋監居臺省積久多閑故實在賊居要亞於石
珍及簡文見立亶學士人着靴上殿無肅恭之禮有怪
之者亶曰吾豈畏劉禪乎從景園巴陵郡叫曰荊州郡
何不送降及至江陵將刑於市泣謂石珍曰吾等死亦
是罪盈石珍與其子昇相抱哭亶謂監刑人曰傳語湘
東王不有廢也君何以興俱腰斬自是更殺賊黨以版
桺舌釘釘之不復得語

陸驗徐麟並吳郡吳人驗少而貧苦落魄無行邑人郁
吉卿者甚富驗傾身事之吉卿貸以錢米驗借以商販
遂致千金因出都下散貨以事權貴朱异其邑子也故
嘗有德遂言於武帝拔之與徐麟兩人通為少府丞太
市令驗本無藝業而容貌特醜先是外國獻生犀其形
甚陋故閭里咸謂驗為生犀驗麟並以貪刻為務百賈
畏之异尤與之昵世人謂之三蠹司農卿傳岐梗直士
也嘗謂异曰卿任參國鈞榮寵如此比日所聞鄙穢狼

籍若使聖主發悟欲免得乎昇曰外間謗讟知之久矣
心苟無愧何卹人言歧謂人曰朱彥和將死矣恃諂以
求容肆辯以拒諫聞難而不懼知惡而不改天奪其鑒
其能久乎驗竟以侵削為能數年遂登列棘鳴佩珥貂
並肩英彥仕至太子右衛率卒贈右衛將軍遠近聞其
死莫不快之麟素為邵陵王綸所憾太清二年為綸所
殺

陳

司馬申字季和河內溫人也祖慧遠梁都水使者父元
通梁尚書左戶郎申早有風概十四便善奕碁嘗隨父
候吏部尚書到溉時梁州刺史陰子春領軍朱异在焉
呼與碁申每有妙思异觀而奇之因引申游處太清之
難父母俱沒因此自誓擔土菜食終身梁元帝承制累
遷鎮西外兵記室參軍及侯景寇郢州申隨都督王僧
辯據巴陵每進策皆見行用僧辯歎曰此生要韃汗馬
或非所長若使撫衆守城必有奇績僧辯之討陸納也

于時賊衆奄至左右披靡申躬蔽僧辯蒙楯而行會裴之橫救至賊乃退僧辯顧而笑曰仁者必有勇豈虛言哉太建中除秣陵令在職以清能見紀有白雀集于縣庭復為東宮通事舍人叔陵之肆逆也事既不捷出據東府申馳召右衛將軍蕭摩訶帥兵先至追斬之後主深嘉焉以功除太子左衛率封文招縣伯兼中書通事舍人遷右衛將軍歷事三帝內掌機密頗作威福性忍害好飛書以譖毀朝之端士遍懼其殃參預謀謨乃於

外宣說以為已力省中祕事往往洩漏性又果敢善應

對能候人主顏色有忤已者必以微言譖之附已者因
機進之是以朝廷內外皆從風靡初尚書右僕射沈君
理卒朝廷議以毛喜代之申慮喜預政乃短喜於後主
曰喜臣之妻兄高宗時稱陛下有酒德請逐去宮臣陛
下寧忘之邪喜由是廢錮又與施文慶李脫兒比周譖
殺傅縡奪任忠部曲以配蔡徵孔範是以文武解體至
於覆滅申嘗晝寢於尚書下省有烏啄其口流血及地

時論以為譖賢之效也後加散騎常侍右衛舍人如故至德四年卒後主嗟悼久之贈侍中護軍將軍進爵為侯謚曰忠及葬後主自為製誌銘子秀嗣官至太子舍人

施文慶不知何許人也家本吏門至文慶好學頗涉書史後主之在東宮文慶事焉及即位擢為中書舍人仍屬叔陵作亂隋師臨境軍國事務多起倉卒文慶聰敏彊記明閑吏職心算口占應時條理由是大被親幸又

自太建以來吏道疏簡百司弛縱文慶盡其力用無所

縱捨分官聯事莫不振懼又引沈客卿陽惠朗徐哲暨
慧景等云有吏能後主信之然並不達大體督責苛碎
聚斂無厭王公大人咸共疾之後主益以文慶為能尤
更親重內外眾事無不委任累遷太子左衛率舍人如
故禎明三年湘州刺史晉熙王叔文在職既久大得人
和後主以其據有上流陰忌之自度素與羣臣少恩恐
不為用無所任者乃擢文慶為都督湘州刺史配以精

兵二千欲令西上仍徵叔文還朝文慶深喜其事然懼居外後執事者持已短長因進其黨沈客卿以自代未發間二人共掌機密時隋軍大舉分道而進尚書僕射袁憲驃騎將軍蕭摩訶及文武羣臣持議請於京口採石置兵五千并出金翅二百緣江上下以為防備文慶恐無兵從已廢其述職而客卿又利文慶之任已得專權俱言於朝曰必有議論不假面陳但作文啓即為通奏憲等以為然二人齎啟入白後主曰此是常事邊城

將帥足以當之若出人船必恐驚擾及隋軍臨江間諜
驟至憲等慙慙奏請至于再三文慶等曰元會將逼南
郊之日太子多從今若出兵事便廢闕後主曰今且出
兵若北邊無事因以水軍從郊何為不可又對曰如此
則聲聞隣境便謂國弱後又以貨動江總總為之游說
後主重違其意而迫羣官之請乃令付外詳議總又抑
憲等由是未決而隋師濟江後主性怯懦不達軍事晝
夜啼泣臺內處分一以委之文慶既知諸將疾已恐其

有功乃奏曰此等快快素不服官迫此事機那可專信
凡有所啟請經略之計並皆不行尋敕文慶領兵頓于
樂游苑陳亡隋晉王廣以文慶受委不忠曲為諂佞以
蔽耳目比黨數人並於石闕前斬之以謝百姓

沈客卿吳興武康人也美風采善談論博涉書史與施
文慶少相親昵累遷至尚書儀曹郎聰明有口辯頗知
故事每朝廷體式吉凶儀注凡所疑議客卿斟酌裁斷
理雖有不經而衆莫能屈事多施行至德初以為中書

舍人兼步兵校尉掌金帛局以舊制軍人士人二品清
官並無關市之稅後主盛脩宮室窮極耳目府庫空虛
有所興造恒若不給客卿每立異端唯以刻削百姓為
事奏請不問士庶並責關市之估而又增重其舊於是
以陽惠朗為太市令暨慧景為尚書金倉都令史二人
家本小吏考校簿領毫釐不差糾譴嚴急百姓嗟怨而
客卿居舍人總以督之每歲所入過於常格數十倍後
主大悅尋加客卿散騎常侍左衛將軍舍人如故惠朗

慧景奉朝請禎明三年客卿遂與文慶俱掌機密隋師至文慶出頓樂游苑内外事客卿總焉臺城失守隋晉王以客卿重賦厚歛以悅於上與文慶暨慧景陽惠朗等俱斬於石闕前徐哲不知何許人也施文慶引為制局監掌刑法亦與客卿同誅

孔範字法言會稽山陰人也曾祖景偉齊散騎常侍祖滔梁海鹽令父忸歷職清顯範少好學博涉書史太建中位宣惠江夏王長史後主即位為都官尚書與江總

等並為狎客。範容止都雅，文章瞻麗，又善五言詩。尤見親愛。後主性愚，很惡聞過失。每有惡事，範必曲為文飾，稱揚贊美。時孔貴人絕愛幸，範與孔氏結為兄妹。寵遇優渥，言聽計從。朝廷公卿咸畏範。範因驕矜，以為文武才能舉朝莫及。從容白後主曰：「外間諸將起自行伍，匹夫敵耳，深見遠慮，豈其所知？」後主以問施文慶。文慶畏範，並以為然。自是將帥微有過失，即奪其兵，分配文吏。隋師將濟江，羣官請為備防。文慶沮壞之。後主未決，範

奏曰長江天塹古來限隔虜軍豈能飛度邊將欲作功
勞妄言事急臣自恨位卑虜若能來定作太尉公矣或
妄言北軍馮死範曰此是我馬何因死亡後主笑以爲
然故不深備尋而隋將賀若弼陷南徐州執城主莊元
始韓擒虎陷南豫州敗水軍都督高文泰與中領軍魯
廣達頊于白塔寺後主多出金帛募人立功範素於武
士不接莫有至者唯負販輕薄多從之高麗百濟崑崙
諸夷並受督時任蠻奴請不戰而已渡江攻其大軍又

司馬消難言於後主曰弼若登高舉烽與韓擒虎相應
鼓聲交震人情必離請急遣兵北據蔣山南斷淮水質
其妻子重其賞賜陛下以精兵萬人守城莫出不過十
日食盡二將之頭可致闕下範冀欲立功志在於戰乃
曰司馬消難狼子野心任蠻奴淮南僉士語並不可信
事遂不行隋軍既逼蠻奴又欲為持久計範又奏請作
一決當為官勒石燕然後主從之明日範以其徒居中
以抗隋師未陣而北範脫身遁免尋與後主俱入長安

初晉王廣所戮陳五佞人範與散騎常侍王瑗王儀御史中丞沈攸之過惡未彰故免及至長安事並露隋文帝以其姦佞諂惑並暴其過惡名為四罪人流之遠裔以謝吳越之人瑗儀並琅邪人瑗刻薄貪鄙忌才害能儀候意承顏傾巧側媚又獻其二女以求親昵攸之險慘苛酷發言邪諂故同罪焉

後魏

王叡字洛誠自云太原晉陽人也六世祖橫張軌參軍

晉亂子孫因居於武威姑臧父橋字法生解天文卜筮
涼州平入京家貧以術自給歷位終於侍御中散天安
初卒贈平遠將軍涼州刺史顯菱侯謚曰敬獻少傳父
業而姿貌偉麗景穆之在東宮見而奇之興安初擢為
太卜中散稍遷為令領太史永明元年文明太后臨朝
獻因緣見幸超遷給事中俄為侍中吏部尚書賜爵太
原公於是內參機密外預政事愛寵日隆朝士懾憚焉
太和二年孝文及文明太后率百寮與諸方客臨虎圈

有猛虎逸登閣道幾至御坐左右侍衛皆驚靡敢獨執
戟禦之虎乃退故親任轉重三年春詔獻與東陽王丕
入八議永受復除四年遷尚書令進爵中山王加鎮東
大將軍置王官二十二人中書侍郎鄭義為傳中郎令
以下皆當時名士又拜獻妻丁氏為妃及沙門法秀謀
逆事發多所牽引獻曰與殺不辜寧赦有罪宜梟惡首
餘從原赦不亦善乎孝文從之得免者千餘人獻出入
帷幄太后密賜珍翫繒綵人莫能知率常以夜帷載閤

官防致前後巨萬不可勝數加以田園奴婢牛馬雜畜
盡皆良美大臣及左右因是以受賚賜外示不私所費
又以萬計及疾病孝文及太后每親視疾侍官省問相
望於道及疾篤上疏陳情并言刑政得失尋薨孝文文
明太后親臨哀慟賜溫明祕器宕昌公王遇監護喪事
贈衛大將軍太宰并州牧謚曰宣王內侍長董醜奴營
塋墓將葬於城東孝文登城樓以望之京都文士為作
哀詩及誄者百餘人乃立獻祠於都南二十里大道右

起廟以時祭薦并立碑銘置守祠五家又詔褒揚獻圖
其捍猛獸狀於諸殿令高允為之讚京邑士女謠稱獻
美造新聲而絃歌之名曰中山王詔班樂府合樂奏之
初獻女妻李沖兄子蕤次女又適趙國李恢子華女之
將行先入宮中其禮略如公主王女之儀太后親御太
華殿寢其女於帳中獻與張祐侍坐獻所親及兩李家
丈夫婦人列於東西廊及女子登車太后送過中路時
人竊謂天子太后嫁女獻之葬也假親姻義舊衰絰縞

冠送喪者千餘人皆舉聲慟泣以要榮利時謂之義孝
叡既貴乃言家本太原晉陽遂移屬焉故其兄弟封爵
多以并州郡縣薨後重贈叡父橋侍中征西將軍左光
祿大夫儀同三司武威王謚曰定追策叡母賈氏為妣
立碑於墓左父子並葬城東相去里餘遷洛後更徙葬
太原晉陽故地子襲字元孫叡薨孝文詔襲代領都曹
為尚書令領吏部曹後襲王爵例降為公太后崩後襲
禮遇稍薄不復關預時事後出為并州刺史輿駕詣洛

路幸其州人庶多為立銘置於大路虛相稱美或云襲

所教也尚書奏免其官詔唯降號二等卒贈豫州刺史

謚曰質襲弟椿字元壽正始中拜太原太守坐事免椿

僮僕千餘園宅華廣聲伎自適無乏於時或有勸椿仕

者椿笑而不答雅有巧思凡所營製可為後法由是正

光中元爰將營明堂辟雍欲徵為將作大匠椿聞而固

辭孝昌中爾朱榮以汾州胡逆表椿慰勞汾胡汾胡與

椿並州服其聲望所至降下事寧授太原太守以預立

莊帝功封遼陽縣子尋轉封真定縣永熙中除瀛州刺史時有風電之變詔書廣訪謹言椿乃上疏言政事之宜椿性嚴察下不容姦所在吏人畏之重足天平末更滿還鄉初椿於宅構起聽事極為高壯時人忽云此乃太原王宅豈是王太原宅椿往為本郡世皆呼為王太原未幾爾朱榮居椿之宅榮封太原王焉至於齊神武之居晉陽霸朝所在人士輻湊椿禮敬親知多所拯接後以老病辭疾客居趙郡之西鯉魚祠山卒贈尚書左

僕射太尉公冀州刺史謚曰文恭及葬齊神武親自弔
送椿妻鉅鹿魏悅次女明達有遠操多識往行前言隨
夫在華州兄子建在洛遇患聞而馳赴膚容虧損親類
歎尚之爾朱榮妻北鄉郡長公主深所禮敬永安中詔
以為南和縣君內足於財不以華飾為意撫兄子牧情
同己子存拯親類所在周給椿名位終始魏有力焉卒
贈鉅鹿郡君無子以兄孫叔明為後

王仲興趙郡南樂人也父天德起自細微至殿中尚書

仲興幼而端謹以父任早給事左右累遷越騎校尉孝
丈在馬圈自不豫大漸迄于崩仲興頗預侍護宣武即
位轉左中郎將及帝親政與趙脩並見寵任遷光祿大
夫領武衛將軍雖與脩並而畏慎自退不若脩倨傲無
禮咸陽王禧之出奔也當時上下微為震駭帝遣仲興
先馳入金墉安慰後與領軍于勁參機要因自迴馬圈
侍疾及入金墉功遂封上黨郡開國公自拜武衛及受
封日車駕每臨饗其宅宣武游幸仲興常侍不離左右

外事得徑以聞百寮亦聳體而承望焉兄可久以仲興故自散爵為征虜府長史帶彭城太守仲興世居趙郡自以寒微云舊出京兆霸城故為雍州大中正尚書後以仲興嘗報過優北海王詳嘗以面啟奏請降減事久不決可久在徐州恃仲興寵勢輕侮司馬梁郡太守李長壽乃令童僕邀毆長壽遂折其臂州以表聞北海王詳因百寮朝集厲色大言曰徐州名藩先帝所重朝廷云何簡用上位遂致此紛紛以徹荒外豈不為國醜辱

仲興是後漸踈宣武乃下詔奪其封邑後卒於并州刺史宣武時又有上谷寇猛少以姿幹充虎賁稍遷至武衛將軍出入禁中無所拘忌自以上谷寇氏得補燕州大中正而不能甄別士庶也卒贈燕州刺史

趙脩字景業趙郡房子人也父謚陽武令脩本給事東宮為白衣左右頗有脅力宣武踐阼愛遇日隆然天性闇塞不閑書疏宣武親政旬月間頻有轉受每受除設宴帝幸其宅諸王公百寮悉從帝親見其母脩能劇飲

至於逼勸觴爵雖北海王詳廣陽王嘉等皆亦不免必
致困亂每適郊廟脩常驂陪出入華林恒乘馬至禁內
咸陽王禧誅其家財貨多賜高肇及脩脩之葬父百官
自王公已下無不弔祭酒犢祭奠之具填塞門街於京
師為制碑銘獸石柱皆發人車牛傳致本縣財用之費
悉自公家凶吉車乘將百兩道路供給皆出於官時將
馬射宣武留脩過之帝如射宮又驂乘輅車旒竿觸東
門折脩恐不逮葬日驛赴窆期左右求從及特遣者數

十人脩道路嬉戲殆無感容或與賓客奸掠婦女裸觀
從者嚙踏喧譁詬詈無節莫不畏而惡之是年又為脩
廣增宅舍多所并兼洞門高堂房廡周博崇麗擬於諸
王其四面鄰居賂入其地者侯天盛兄弟越次出補長
史大郡脩起自賤伍暴致富貴奢傲無禮物情所疾因
其在外左右或諷糾其辜自其葬父還也舊寵少薄初
王顯附脩後因忿閭密伺其過列脩葬父時路中淫亂
不軌又云與長安人趙僧擿謀匿玉印事高肇甄琛等

構成其辜乃密以聞始琛及李馮等曲事脩無所不至
懼相連及乃爭共糾擿遂有詔按其罪惡鞭之一百徙
敦煌為兵其家宅作徒即仰停罷所親在內者悉令出
禁是日脩詣領軍于勁第與之搏菹籌未及畢羽林數
人相續而至稱詔呼之脩驚起隨出路中執引脩馬詣
領軍府琛與顯監決其辜先具問事有力者五人更迭
鞭之占令必死旨決百鞭其實三百脩素肥壯腰腹博
碩堪忍楚痛了不轉動鞭訖即名驛馬促之令發出城

西門不自勝舉縛置鞍中急驅馳之其母妻追隨不得與語行八十里乃死初于后之入脩之力也脩死後領軍于勁猶追感舊意經恤其家自餘朝士昔相宗承者悉棄絕之以示已之疎遠焉

茹皓字禽奇舊吳人也父謙之本名要隨宋巴陵王休若為將至彭城寓居淮陽上黨年十五六為縣金曹吏南徐州刺史沈陵見而善之自隨入洛舉充孝文白衣左右宣武踐阼皓侍直禁中稍被寵接宣武嘗拜山陵

路中欲引與同車黃門侍郎元匡切諫乃止及帝親政
皓眷賚日隆時趙脩亦被幸妬之求出皓皓亦慮見危
禍不樂內官遂超授濮陽太守其父因皓訟理舊勲先
除兗州陽平太守賜以子爵父子剖符名邦郡境相接
皓忻於去內不以疎外為戚及趙脩等敗竟獲全皓雖
起細微為守乃清簡寡事後授左中郎將領直閣寵待
如前皓既宦達自云本出鴈門鴈門人諂附者乃因薦
皓於司徒請為肆州大中正詔特依許遷驍騎將軍領

華林諸作皓性微工巧多所興立為山於天淵池西採掘北芒及南山佳石徙竹汝潁羅蒔其間經構樓觀列於上下樹草栽木頗有野致帝心悅之以時臨幸焉皓貴寵日昇關預政事太傅北海王詳以下咸祗憚之皓娶僕射高肇從妹於帝為從母迎納之日詳親詣之禮以馬物皓又為弟娉安豐王延明妹延明恥非舊流不許詳勸之云欲覓官職如何不與姑皓為婚姻也延明乃從之皓頗敏慧折節下人潛自經營陰有納受貨產

盈積起宅宮西朝貴弗之及也時帝雖親萬機皓率常居內留宿不還傳可門下奏事未幾轉光祿少卿意殊不已方欲陳馬圈從先帝勞更希榮舉初脩皓之寵北海王詳皆附之又直閭劉胄本為詳所薦常感恩高肇素嫉諸王常規陷害既知詳與皓交關相昵乃構之云皓等將有異謀宣武乃召中尉崔亮令奏皓胄常季賢陳埽靜四人擅勢納賄及私亂諸事即日執皓等皆詣南臺翌日奏處殺之皓妻被髮出堂而迎皓皓徑入哭

別食椒而死。曹字元孫，後位直閣將軍。季賢起於主馬宣武初，好騎乘，因是獲寵，位司藥丞。仍主廐閑，埽靜徐義恭並彭城舊營人。埽靜能為宣武典櫛梳，義恭善執衣服，並以巧便。旦夕居中，愛幸相侔。官叙不異，二人皆奉承。皓皓亦接眷，而埽靜偏為親密。與皓常在左右，略不歸休。皓敗，埽靜亦死於家。義恭小心謹慎，皓等死後，彌見幸信。宣武不豫，義恭晝夜扶抱，崩于懷中。義恭諂附元乂，乂有淫宴，多在其宅。位終左光祿大夫。

趙邕字令和自云南陽人也潔白美鬚眉司空李沖之
貴寵也邕以少年端謹出入其家頗給按磨奔走之役
沖令與諸子游處人有東帶謁沖者時託之以自通太
和中給事左右至殿中監宣武即位及親政猶居本任
微與趙脩結為宗援然亦不甚相附也邕父怡以邕寵
召拜太常少卿尋為荊州大中正出為荊州刺史怡乃
致其母喪葬於宛城之南趙氏舊墟後拜金紫光祿大
夫卒贈相州刺史宣武每出入郊廟脩恒以常侍兼侍

中陪乘而邕兼奉車都尉執轡同載時人竊論號為二
趙以趙出南陽徒屬荊州邕轉給事中南陽中正以父
為荊州大中正罷宣武崩邕兼給事黃門後為幽州刺
史貪與范陽盧氏為婚女父早亡其叔許之而母不從
母北平陽氏携女至家藏避規免邕乃考掠陽叔遂至
於死陽氏訴寃邕坐處死會赦免孝昌初卒

侯剛字乾之河南洛陽人也其先代人本出寒微少以
善於鼎俎得進膳出入積官至嘗食典御宣武以其質

直賜名剛馬稍遷左中郎將領刀劔左右後領太子中
庶子宣武崩剛與侍中崔光迎明帝於東宮尋除衛尉
卿封武陽縣侯俄為侍中撫軍將軍恒州大中正進爵
為公熙平中侍中游肇出為相州剛言於靈太后曰昔
高氏擅權游肇抗衡不屈而出牧一藩未盡其美宜還
引入以輔聖主太后善之剛寵任既隆江陽王澄以其起由膳
長孫承業皆以女妻其子司空任城王澄以其起由膳
宰頗竊侮之云此近為我舉食然公坐對集敬過不虧

後剛坐掠殺試射羽林為御史中尉元匡所彈處剛大辟尚書令任城王澄為之言於靈太后令削封三百戶解嘗食典御剛於是頗為失意剛自太和進食遂為典御歷兩都三帝二太后將三十年至此始解御史中尉元匡之廢也剛為太傅清河王懌所舉除車騎將軍領御史中尉及領軍元乂執政剛長子乂之妹夫乃引剛為侍中左衛將軍還領嘗食典御以為扳援復領御史中尉剛啟軍旅稍興國用不足求以已邑俸粟賑給征

人北至軍下明帝許之孝昌元年除領軍初元乂之解
領軍靈太后以乂腹心尚多恐難卒制故權以剛代之
示安其意尋出為冀州刺史剛在道詔暴其朋黨元乂
逼脅内外降為征虜將軍餘悉削黜終於家永安中贈
司徒公剛以上谷先有侯氏於是始家焉

徐紇字武伯樂安博昌人也家世寒微紇少好學頗以
文詞見稱宣武初自主書除中書舍人諂附趙脩脩誅
坐徙梟罕雖在徒役志氣不撓故事捉逃役流兵五人

者聽免紇以此得還久之復除中書舍人太傅清河王
懌以文翰待之及元乂害懌出為鴈門太守稱母老解
郡尋飾貌事乂又大得乂意靈太后反政以紇曾為懌
所顧待復自母憂中起為中書舍人曲事鄭儼儼特信
任之俄遷給事黃門侍郎仍領舍人總攝中書門下事
軍國詔命莫不由之時有急速令數吏執筆或行或卧
人別占之造次俱成不失事理雖無雅才咸得濟用時
黃門侍郎太原王遵業琅邪王誦並稱文學亦不免為

紇秉筆承其指授尋加金紫紇機辨有智數公當決斷
終日不以為勞長直禁中略無休息時復夜還與沙門
講論分宵達旦而心力無怠道俗歎服之然性浮動慕
權利外似謇正內實諂諛時豪勝已必相陵架書生貧
士矯意禮之其詭態若此有識鄙焉紇既處腹心參判
機密勢傾一時遠近堪嗟與鄭儼李神軌寵任相亞時
稱徐鄭焉然無經國大體好行小數說靈太后以鐵券
間爾朱榮左右榮知深以為憾啟求誅之榮將入洛既

尅河梁紇矯詔夜開殿中取驂騑御馬十餘匹東走兗
州羊侃時為泰山太守紇往投之說侃令舉兵從之遂
聚兵反共紇圍兗州孝莊初遣侍中于暉為行臺與齊
神武討之紇慮不免說侃請乞師於梁侃信之遂奔梁
著文筆駁論數十卷多有遺落時或存於世焉

鄭儼字季然滎陽開封人也祖敬叔濮陽太守父籍徐
州平東長史儼容貌壯麗初為司徒胡國珍行參軍因
為靈太后所幸時人未之知後太后廢蕭寶夤西征以

儼為友及太后反政儼請使還朝復見寵待拜諫議大夫中書舍人領嘗食典御晝夜禁中寵愛尤甚儼每休沐太后嘗遣閹童隨侍儼見其妻唯得言家事而已與徐紇俱為舍人儼以紇有智數仗為謀主紇以儼寵幸既盛傾身承接共相表裏勢傾內外城陽王徽亦與之合當時政令歸於儼等遷散騎常侍車騎將軍舍人常侍如故明帝崩事出倉卒天下咸言儼計爾朱榮舉兵向洛陽以儼紇為辭榮逼京師儼走歸鄉里儼從兄仲

明欲據郡起衆尋為其部下所殺儼與仲明俱傳首洛陽

郭秀范陽涿人也事齊神武稍遷行臺中丞封壽陽伯親寵日隆多受賂遺進退人物張伯德祁仲彥張華原之徒皆深相附會秀疾神武親視之問所欲官乃啟為七兵尚書除書未至而卒家無成人子弟神武自至其宅親使錄知其家資粟帛多少然後去贈儀同三司恒州刺史命其子孝義與太原公以下同學讀書初秀忌

嫉楊愔誑脅令其逃亡秀死後愔還神武追忿秀即日
斥遣孝義終身不齒

北齊

和士開字彥通清都臨漳人其先西域商胡本姓素和
氏父安恭敏善事人稍遷中書舍人魏靜帝嘗夜與朝
賢講集命安看斗柄所指安曰臣不識北斗神武聞之
以為淳直由是啟除給事黃門侍郎位儀州刺史士開
貴贈司空公尚書左僕射冀州刺史謚文貞公士開幼

而敏慧選為國子學生解悟捷疾為同業所尚天保初武成封長廣王辟士開開府行參軍武成好握槊士開善於此戲由是遂有斯舉加以傾巧便僻又能彈胡琵琶因致親狎嘗謂王曰殿下非天人也是天帝也王曰卿非世人也是世神也其深相愛重如此文宣知其輕薄不欲令王與小人相親善責其戲狎過度徙之馬城乾明元年孝昭誅楊愔等敕追還長廣王請之也武成即位累遷給事黃門侍郎侍中高元海黃門郎高乾和

及御史中丞畢義雲等疾之將言其事士開乃奏元海等交結朋黨欲擅威福乾和因被疎斥義雲反納貨於士開除兗州刺史士開初封定州真定縣子尋進為伯天統元年加儀同三司尋除侍中加開府及遭母劉氏憂帝聞而悲惋遣武衛將軍侯呂芬詣宅晝夜扶侍并節哀止哭又遣侍中韓寶業齋手勅慰諭云朕之與卿本同心腹今懷抱痛割與卿無異當深思至理以自開慰成服後呂芬等始還其日遣韓寶業以犢車迎士開

入內帝親握手下泣曉諭然後遣還駕幸晉陽給假聽
過七日續發其見重如此并諸弟四人並起復本官四
年再遷尚書右僕射侍中如故帝先患氣疾因飲酒輒
大發動士開每諫不從後帝屬氣疾發又欲飲酒士開
淚下獻歎而不能言帝曰卿此是不言之諫因不飲酒
及冬公主出降段氏帝幸平原王第始飲酒焉又除尚
書左僕射仍兼侍中武成在外朝視事或在內宴賞須
臾之間不得不與士開相見或累月不歸一日數入或

放還之後俄頃即追未至之間連騎催喚奸諂日至寵
愛彌隆前後賞賜不可勝紀言辭容止極諸鄙褻以夜
繼日無復君臣之禮至說武成云自古帝王盡為灰土
堯舜桀紂竟復何異陛下宜及少壯恣意作樂從橫行
之即是一日快活敵千年國事分付大臣何慮不辦無
為自勤約也帝大悅於是委趙彥深掌官爵元文遙掌
財用唐邕掌外兵白建掌騎兵馮子琮胡長燦掌東宮
帝三四日乃一坐朝書數字而已略無言須臾罷入及

帝寢疾於乾壽殿士開入侍醫藥帝謂士開有伊霍之才屬以後事臨崩握其手曰勿負我也仍絕於士開之手後主以武成顧託之恩深委任之又先得幸於胡太后是以彌見親密趙郡王叡與婁定遠元文遙等謀出土開仍引任城馮翊二王及段韶安吐根共為計策屬太后觴朝貴於前殿叡面陳士開罪失云士開先帝弄臣城狐社鼠受納貨賄穢亂宮掖臣等義無杜口冒以死陳太后曰先帝在時王等何意不道今日欲欺孤寡

邪但飲酒勿多言獻詞色愈厲安吐根繼進曰臣本商胡得在諸貴行末既受厚恩豈敢惜死不出士開朝野不定太后曰別日論之王等且散獻等或投冠於地或拂衣而起言詞咆哮無所不至明日獻等復於雲龍門令文遙入奏三反太后不聽段韶呼胡長聚使傳太后言曰梓宮在殯事太忽速猶欲王等更思量趙郡王等遂並拜謝長聚復命太后謂曰成妹母子家計者兄之力也厚賜獻等而罷之太后及後主召問士開士開曰

先帝於羣臣之中待臣最重陛下諒闇始爾大臣皆有
覬覦今若出臣正是翦陛下羽翼宜謂獻等云文遙與
臣同是任用豈得一去一留並可以為州且依舊出納
待過山陵然後發遣獻等謂臣真出心必喜之後主及
太后告獻等如其言以士開為兗州刺史文遙為西兗
州刺史山陵畢獻等促士開就路士開載美女珠簾及
諸寶翫以詣婁定遠謝曰諸貴欲殺士開蒙王特賜性
命用作方伯今欲奉別且先送二女子一珠簾定遠大

喜謂士開曰欲得還入不士開曰在內久常不自安不願更入定遠信之送至門士開曰今日遠出願得一辭覲二宮定遠許之士開由是得見太后及後主進說曰先帝一旦登遐臣愧不能自死觀朝貴意勢欲以陛下為乾明臣出之後必有大變臣復何面目見先帝於地下因慟哭後主及太后皆泣問計將安出土開曰臣已得入復何所慮正須數行詔書耳於是詔出定遠為青州刺史青趙郡王廩以不臣之罪名入殺之復除士開

侍中左僕射定遠歸士開所遺仍加以餘珍賂之武平
元年封淮陽王尋除尚書令錄尚書事食定州常山郡
幹武成時恒令士開與太后握槊又出入卧內遂與太
后為亂及武成崩後彌自放恣琅邪王儼惡之與領軍
大將軍庫狄伏連侍中馮子琮御史王子宜武衛大將
軍高舍洛等謀誅之伏連發京畿軍士帖神武千秋門
外並私約束不聽士開入殿士開雖為領軍恒性好內
多早下縱當直必須還宅晚始來門禁宿衛略不在意

其年七月二十五日旦士開依式早參庫狄伏連前把
士開手曰今有一大好事王子宜便授一函云有敕令
王向臺遣軍士防送禁治書侍御聽事儼遣都督馮永
洛就臺斬之時年四十八先是鄴下童謠云和士開當
入臺士開謂入上臺至是果驗儼令御史李幼業羊立
正將令史就宅簿錄家口自領兵士從殿西北角出斛
律明月說後主親自曉告軍士軍士果散即斬伏連及
王子宜並支解棄屍殿西街自餘皆辮頭反縛付趙彥

深於涼風堂推問死者十餘人帝哀悼不視事數日後
追憶不已詔起復其子道盛為通直散騎常侍又敕其
弟士休入內省參典機密詔贈士開假黃鉞十州諸軍
事右丞相太宰司徒公錄尚書事謚曰文定士開稟性
庸鄙不窺書傳發言吐論唯以諂媚自資自河清天統
以後威權轉盛富商大賈朝夕填門聚斂貨財不知紀
極雖公府屬掾郡縣守長不拘階次啟牒即成朝士不
知廉恥者多相附會甚者為其假子與市道小人丁鄒

嚴興等同在昆季行列又有一人士曾參士開疾患遇

醫人云王傷寒極重應服黃龍湯士開有難色是人云

此物甚易王不須疑惑請為王先嘗之一舉便盡士開

深感此心為之彊服遂得汗病愈其勢傾朝廷如此雖

以左道事之者不隔賢愚無不進擢而正理違忤者亦

頗能含容之士聞見人將加刑戮多所營救既得免罪

即令諷諭責其珍寶謂之贖命物雖有全濟者皆非直

道安吐根安息胡人曾祖入魏家於酒泉吐根魏末充

使蠕蠕因留塞北天平初蠕蠕主使至晉陽吐根密啟
本蕃情狀神武得為之備蠕蠕果遣兵入掠無獲而反
神武以其忠款厚加賞賚其後與蠕蠕和親結成婚媾
皆吐根為行人也吐根性和善頗有計策頻使入朝為
神武親待在其本蕃為人所譖奔投神武文襄嗣事以
為假節涼州刺史率義侯稍遷儀同三司食永昌郡幹
皇建中加開府齊亡年卒

穆提婆本姓駱漢陽人也父超以謀叛伏法提婆母陸

令萱配人掖庭提婆為奴後主在襁褓中令其鞠養謂之乾阿妳呼姊姊遂為胡太后昵愛令萱奸巧多機辯取媚百端宮掖之中獨擅威福封為郡君和士開高阿那肱皆為郡君義子天統初奏引提婆入侍後主朝夕左右大被親狎無所不為武平元年稍遷儀同三司又加開府尋授武衛大將軍秦州大中正二年除侍中轉食樂陵郡幹寵遇彌隆遂至尚書左右僕射領軍大將軍錄尚書事封城陽郡王贈其父司徒公尚書左僕射

城陽王令萱又佞媚穆昭儀養之為女是以提婆改姓
穆及穆氏定位號令萱曰太姬視第一品班在長公主
之上自武平三年之後令萱母子勢傾內外賣官鬻獄
聚斂無厭每一賜與動傾府藏令萱則自太后以下皆
受其指麾提婆則唐邕之徒皆重跡屏氣提婆嘗有罪
太姬於帝前罵之曰奴斷我兒兒謂帝奴謂提婆也斛
律皇后之廢也太后欲以胡昭儀正位後宮力不能遂
乃卑辭厚禮以求令萱令萱亦以胡氏寵幸方睦不得

已而白後主立之然意在穆昭儀每私謂後主曰豈有男為皇太子而身為婢妻又恐胡后不可以正義離間乃外求左道行厭蠱之術旬朔之間胡氏遂即精神恍惚言笑無恒後主遂漸相畏惡令萱一旦忽以皇后服御衣被穆昭儀又先別造寶帳爰及枕席器玩莫匪珍奇坐昭儀於帳中謂後主云有一聖女出將大家看之及見昭儀更相媚悅令萱云如此人不作皇后遣何物人作皇后於是立穆氏為右皇后以胡氏為左皇后尋

復黜胡以穆為正嫡引祖珽為宰相殺胡長仁皆令萱
所為也自外殺生與奪不可盡言提婆雖庸品廝濫而
性乃和善不甚害物耽聲色極奢侈晚朝早退全不以
公事關懷未嘗毒害士人亦由此稱之晉州軍敗後主
還鄴提婆奔投周軍令萱自殺子孫大小皆棄市籍沒
其家周武帝以提婆為柱國宜州刺史未幾云將據宜
州起兵與後主相應誅死後主及齊氏諸王並因此非
命

高阿那肱善無人也父市貴從神武以軍功封常山郡公位晉州刺史贈太尉公及阿那肱貴寵贈成臯王阿那肱初為庫典每從征討以功封宜城縣男天保初除庫典都督四年從討契丹及蠕蠕以躋捷見知太寧初除除假儀同三司武衛將軍阿那肱工於騎射性便僻善事人每宴射之次大為武成所愛重又諂悅和士開尤相褻狎士開每為之言彌見親待河清中除儀同三司食汾州定陽作城二郡幹以破突厥封宜君縣伯天統

初加開府除侍中驃騎大將軍領軍別封昌國縣侯後
主即位除并省尚書右僕射武平元年封淮陽郡王仍
遷并省尚書左僕射又除并省尚書令領軍大將軍并
州刺史阿那肱才伎傭劣不涉文史識用尤在士開之
下而奸巧計數亦不逮士開既為武成所幸多令在東
宮侍衛後主所以大被寵遇士開死後後主謂其識度
足繼士開遂致位宰輔武平四年令其錄尚書事又總
知外兵及內省機密頓不如和士開駱提婆母子賣獄

鸞官韓長鸞憎疾良善而少言辭不妄喜怒亦不察人
陰私虛相讒構遂至司徒公右丞相其錄尚書刺史並
如故及周師逼平陽後主於天池校獵晉州頻遣馳奏
從旦至午驛馬三至阿那肱云大家正作樂邊境小小
兵馬自是常事何急奏聞向暮更有使至云平陽城已
陷賊方乃奏知明即欲引軍淑妃又請更合圍所以彌
致遲緩及軍赴晉州命阿那肱率前軍先進仍總節度
諸軍後主至平陽城下謂阿那肱曰戰是邪不戰是邪

阿那肱曰兵雖多堪戰者不過十萬病傷及繞城火頭
三分除一昔國家攻玉壁彼援軍來即退今日將士豈
勝神武皇帝時邪不如勿戰却守高梁橋安吐根曰一
把子賊馬上刺取擲汾河中帝意未決諸內參曰彼亦
天子彼尚能懸軍遠來我何為守壘示弱帝曰此言是
也於是橋壘進軍使內參讓阿那肱曰爾富貴足惜性
命邪後主從穆提婆觀戰東偏頗有退者提婆怖曰大
家去大家去帝與淑妃奔高梁橋開府奚長樂諫曰半

進半退戰家之常體今兵衆全整未有傷敗陛下舍此
安之御馬一動人情驚亂願速還安慰之武衛張常山
自後至亦曰軍尋收訖甚整頓圍城兵亦不動至尊宜
回不信臣言乞將內參往視帝將從之提婆引帝肘曰
此言豈可信邪帝遂北馳有軍士雷相告稱阿那肱遣
臣招引西軍行到文侯城恐事不果故還聞奏後主召
侍中斛律孝卿令其檢校孝卿固執云此人自欲投賊
行至文侯城迷不得去畏死妄語耳事遂寢還至晉陽

阿那肱腹心人馬子平告阿那肱謀反又以為虛妄斬

子平乃顛沛還鄴侍衛逃散唯阿那肱及闍寺數十騎
從行復除大丞相後主走度河令阿那肱以數千人投
濟州關仍遣覘候周軍進止日夕馳報阿那肱每奏云
周軍未至且在青州集兵馬未須南行及周軍且至關
所部兵馬皆散阿那肱遂降時人皆云阿那肱表款周
武必仰生致齊主故不速報兵至使後主被禽阿那肱
至長安授大將軍封郡公尋出為隆州刺史大象末在

蜀從王謙起兵誅死初天保中文宣自晉陽還鄴有愚僧禿師於路中大叫呼文宣姓名云阿那瓌終破你國時蠕蠕主阿那瓌在塞北彊盛帝尤忌之所以每歲擊討後亡齊者遂屬高阿那肱云肱雖作肱字世人皆稱為瓌音斯固亡秦者胡蓋縣定於窈冥也

韓鳳字長鸞昌黎人也父永興開府青州刺史高密郡公鳳少聰察有膂力善騎射稍遷烏賀鎮大賢鎮正都督後主居東宮年尚幼武成簡都督三十人送令侍衛

鳳在其數後主親就衆中牽鳳手曰都督看兒來因此
被識數喚共戲襲高密郡公位開府儀同三司武平二
年和士開為庫狄伏連等矯害敕咸陽王斛律明月宜
陽王趙彥深在涼風堂推問支黨其事祕密皆令鳳口
傳然後宣詔敕號令文武禁掖防守悉以委之除侍中
領軍總知省內機密祖珽曾與鳳於後主前論事珽語
鳳云彊弓長稍容相推讓軍國謀算何由得爭鳳答云
各出意見豈在文武優劣後主將誅斛律明月鳳固執


不從祖珽因有讒言既誅明月數日後主不與語後尋復舊仍封舊國昌黎郡王又加特進及祖珽除北徐州刺史即令赴任既辭之後遲留不行其省事徐孝遠密告祖珽誅斛律明月後矯稱敕賜其珍寶財物亦有不云敕而徑迴取者敕令領軍將軍侯呂芬追珽還引入侍中省鎖禁其事首尾並鳳約敕責之進位領軍大將軍餘悉如故息寶行尚公主在晉陽賜甲第一區其公主生男滿月駕幸鳳宅宴會盡日每旦早參先被勅喚

顧訪出後方引奏事官若不視事內省急速者皆附奏
聞軍國要密無不經手東西巡幸及山水游戲射獵獨
在御旁與高阿那肱穆提婆共處衡軸號曰三貴損國
害政日月滋甚壽陽陷沒鳳與穆提婆聞告敗握槊不
輟曰他家物從他去後帝使於黎陽臨河築城戍曰急
時且守此作龜茲國子更可憐君臣應和若此鳳恒帶
刀走馬未嘗安行瞋目張拳有噉人之勢每咤曰恨不
得剉漢狗飼馬又曰刀止可刈漢賊頭不可刈草其弟

萬歲及其二子寶行寶信並開府儀同萬歲又拜侍中亦處機要寶信尚公主駕復幸其宅親戚咸蒙官賞鳳母鮮于段孝言之從母子姊也為此偏相參附奏遣監造晉陽宮陳德信馳驛檢行見孝言役官夫匠自營宅即語云僕射為至尊起臺殿未訖何容先自營造鳳及穆提婆亦遣孝言分工匠為已造宅德信還具奏聞及幸晉陽鳳又以官馬與他人乘騎上因此發忿與提婆並除名亦不露其辜仍毀其宅公主離婚復被遣向鄴

吏部門參及後主晉陽走還被勅喚入內尋詔復王爵
及開府領軍大將軍常在左右仍從後主走度河到青
州并為周軍所獲鳳於權要之中尤嫉人士朝夕譙私
唯相譖訴崔季舒等寃酷皆鳳所為也每一賜與動至
千萬恩遇日甚彌自驕恣意色嚴厲未嘗與人相承接
朝士諮事莫敢仰視動至呵叱輒詈云狗漢大不可耐
唯須殺却若見武職雖廝養末品亦容下之後仕隋位
終於隴州刺史

通志卷一百八十四



總校官庶吉士臣侍朝

校對官檢討臣王福清

謄錄監生臣秦在亶